

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 108085 25 K
Visoko, 08.01.2026.godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog M.A. sin H.iz V., zbog krivičnog djela nasije u porodici iz člana 222. stav 2. KZ FBiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0064860 25 od 17.09.2025.godine, na pretresu za izricanje krivično pravne sankcije održanom u prisustvu Kantonalne tužitelja Adine Karadža i optuženog M.A., dana 08.01.2026.godine, donio je i javno objavio:

P R E S U D U

OPTUŽENI : **M.A.**, zvani „L.“, sin H. i majke S. rođene S., rođen ... godine u V., gdje je i nastanjen u mjestu G.M. broj ..., pismen, po zanimanju NK radnik, nezaposlen, oženjen, otac troje djece, vojsku nije služio, ne vodi se u vojnoj evidenciji, ..., državljanin BiH, JMB: ..., osuđivan

K r i v j e

Što je:

Dana 27.06.2025. godine, oko 15,00 sati, u V., u kući u kojoj stanuje sa svojom suprugom A.A. i njihovim mlđb. djetetom ...koja kuća se nalazi u mjestu G.M. broj ..., prvo verbalno napao svoju suprugu A. a potom je uhvatio desnom rukom za vrat i stisnuo, pa kada je iz njenih ruku uzeo njihovo mlđb. dijete zatvorenom pesnicom je udario u glavu i pljunuo u lice, rekavši joj pri tome da više nikada neće vidjeti njihovo dijete, svjestan da na taj način ugrožava njen mir, psihičko zdravlje i tjelesnu cjelovitost, što je i htio, te ovakvim nasiljem i drskim ponašanjem ugrozio mir, psihičko zdravlje i tjelesnu cjelovitost svoje supruge A.A.,

čime je učinio krivično djelo Nasilje u porodici iz člana 222 stav 2 KZ F BiH

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH,

i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 7(sedam)mjeseci, a koja se neće izvršiti ako optuženi za vrijeme od 3 /tri/ godine, od dana pravosnažnosti presude, ne počini novo krivično djelo.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0064860 25 od 17.09.2025.godine, optužilo je M.A., zbog krivičnog djela nasilje u porodici iz člana 222. stav 2. KZ F BiH.

Optužnica je potvrđena od strane sudije za prethodno saslušanje ovog suda dana 29.09.2025.godine. Na ročištu o izjašnjenju o krivnji dana 02.12.2025.godine, optuženi M.A. je izjavio da je kriv za krivično djelo Nasilje u porodici iz člana 222. stav 2. KZ F BiH

Na ročištu o razmatranju izjave o priznanju krivnje dana 08.01.2026.godine, sud se uvjerio da je optuženi M.A. izjavu o priznanju krivnje dao dobrovoljno, svjesno i sa razumijevanjem, kao i nakon upoznavanja o mogućim posljedicama ovog krivičnog postupka.

Sud je utvrdio da ima dovoljno dokaza o krivnji optuženog, nakon čega je prihvatio izjavu o priznanju krivnje optuženog i istovremeno odredio pretres za izricanje krivično pravne sankcije.

Sud je stekao uvjerenje da je optuženi M.A. počinio krivično djelo koje mu se stavlja na teret, a koje djelo je izvršeno na način, u vrijeme i u mjestu kako je to navedeno u dispozitivu ove presude nakon izvršenog uvida u predložene dokaze i to : Zapisnik o ispitivanju osumnjičenog M.A. a PS Visoko broj: 08-02-09/1-1195/25 od 04.09.2025. godine, Zapisnici o saslušanju svjedoka – oštećene A.A. PS Visoko broj: 08-02-09/1-811/25 od 27.06.2025. godine i broj: 08-02-09/1-1199/25 od 04.09.2025.godine, Rješenje Općinskog suda u Visokom broj: 41 0 Pr 107089 25 Zm od 27.06.2025. godine, Akt Centra za socijalni rad Visoko broj: 09-04-11-59/25 od 09.07.2025. godine i Izvod iz kaznene evidencije za osumnjičenog M.A. a PS Visoko od 30.06.2025. godine

Naime, priznanjem optuženog koje je u potpunosti i u skladu sa predloženim dokazima, nesporno je dokazano da je isti počinio krivično djelo koje mu se stavlja na teret.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predloženih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela.

Stoga je sud optuženog oglasio krivim za navedeno krivično djelo i izrekao mu krivično pravnu sankciju.

Prilikom izricanja krivično pravne sankcije sud je cijenio optuženom M.A. u kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, kao i činjenicu da je bolestan o čemu je uložio i Nalaz KCU Sarajevo od 09.04.2025.godine DG:Cardiomyopathy dilatata comp(pacijent je kandidat za mehaničku cirkulatornu podršku srca/transplantaciju srca.

Sud je cijenio i činjenicu da je pristupila i oštećena A.A. koja je na upit suda izjavila ,da ju je taj dan samo gurnuo u glavu, da je nije prebio, da je dijete njena majka vodila suprugu dok su bile zabrane, da su se u međuvremenu pomirili , da je sad situacija dobra u kući i da nema

nikakvih problema. Moli sud da mu izrekne uvjetnu osudu jer je sad situacija dobra, a posebno zbog njegove bolesti.

Oštećena je izjavila na upit suda da ne traži nikakvu naknadu štete.

Cijeneći utvrđene okolnosti na strani optuženog, sud je optuženom M.A., za navedeno krivično djelo na osnovu članova: 42., 49. i 62. KZ FBiH, izrekao USLOVNU OSUDU. Kojom se optuženom za počinjeno krivično djelo utvrđuje kazna zatvora u trajanju od 7 (sedam) mjeseci, a koja se neće izvršiti ako optuženi za vrijeme od 3 /tri/ godine, od dana pravosnažnosti presude, ne počini novo krivično djelo, u uvjerenju da će se istom, ostvariti svrha kažnjavanja predviđena u članu 42. KZ FBiH, te postići kako opća, tako i specijalna prevencija.

Na osnovu člana 202. stav 4. ZKP FBiH, sud je optuženog oslobodio plaćanja troškova krivičnog postupka i isti padaju na teret sredstava suda.

Sudija
Avdija Avdić

POUKA: Protiv ove presude dozvoljena je žalba Kantonalnom sudu u Zenici, putem ovog suda, u roku od 15 dana od prijema presude, u tri primjerka.